

BOSNA I HERCEGOVINA
AGENCIJA ZA JAVNE NABAVKE/NABAVE



БОСНА И ХЕРЦЕГОВИНА
АГЕНЦИЈА ЗА ЈАВНЕ НАБАВКЕ

BOSNIA AND HERZEGOVINA
PUBLIC PROCUREMENT AGENCY

Broj: 02-14-2-447-2/17
Sarajevo, 06.02.2017.godine

**INTERNATIONAL INSTITUT FOR
PUBLIC PROCURMENT**

Predmet: Obavještenje
Veza: Vaš e-mail od 05.02.2017.godine

Poštovani,

Povodom vašeg obavještenja da International Institut for Public Procurement sprovodi istraživanje transparentnosti u postupcima javnih nabavki u BiH, ovim putem Vas obavještavamo da pozdravljamo svaku dobronamjernu analizu u sistemu javnih nabavki u BiH, te se nadamo da će te nas o rezultatima iste blagovremeno informisati.

Takođe, ovim putem vas obavještavamo, a povodom vaših zahtjeva za slobodan pristup informacijama za dostavom zapisnika sa otvaranja ponuda koji u skorije vrijeme upućujete ugovornim organima u BiH, o slijedećem:

Odredbom člana 63. Zakonom o javnim nabavkama (u daljem tekstu: Zakon) se definiše otvaranje ponuda u postupku javne nabavke. Tako stav (1) navedenog člana Zakona propisuje da se ponude otvaraju na javnom otvaranju ponuda, neposredno nakon isteka roka za prijem ponuda. Ponude primljene nakon isteka roka određenog za prijem ponuda neotvorene se vraćaju ponuđačima.

Narednim stavom istog člana Zakona je propisano da se ponude otvaraju na sjednici komisije za nabavke na dan i vrijeme koji su navedeni u tenderskoj dokumentaciji. Svi ponuđači koji su na vrijeme dostavili ponude ili njihovi ovlašteni predstavnici, kao i sva druga zainteresirana lica imaju pravo prisustvovati postupku otvaranja ponuda. Izmjena krajnjeg roka za prijem ponuda uticat će na promjenu datuma otvaranja ponuda.

Dakle, otvaranje ponuda u postupku javne nabavke je javno, gdje pored ponuđača, odnosno njihovih predstavnika otvaranju ponuda mogu prisustvovati i druga zainteresirana lica.

Nadalje, odredbom člana 11. stav (3) Zakona je propisano da nakon javnog otvaranja ponuda nijedna informacija u vezi sa ispitivanjem, pojašnjenjem ili ocjenom ponude ne smije se otkrivati nijednom učesniku u postupku ili trećem licu prije nego što se odluka o rezultatu postupka ne saopći učesnicima u postupku.

Dalje, u stavu (5) navedenog člana Zakona propisano je da nakon prijema odluke o izboru najpovoljnijeg ponuđača ili odluke o poništenju postupka nabavke, a najkasnije do isteka roka za žalbu, ugovorni organ će po prijemu zahtjeva ponuđača, a najkasnije u roku od dva dana od dana prijema zahtjeva, omogućiti uvid u svaku ponudu, uključujući dokumente podnesene u skladu s članom 45. stav (2) Zakona o javnim nabavkama, kao i pojašnjenja originalnih dokumenata u skladu s članom 68. stav (3) Zakona o javnim nabavkama, sa izuzetkom informacija ponuđača označenih kao povjerljive u skladu s ovim članom.

Dakle, princip povjerljivosti, u naprijed navedenom smislu, odnosi se na tok postupka nabavke nakon javnog otvaranja ponuda. Prema tome, nije dozvoljeno otkrivati informacije vezane za ispitivanje, pojašnjenje ili ocjenu ponuda koje vrši ugovorni organ, niti jednom ponuđaču ili trećem licu prije nego što se odluka o rezultatu postupka ne saopći učesnicima u postupku.

To znači da je nakon obavještanja pobjednika da je dobio taj ugovor, otkrivanje određenih informacija vezanih za ispitivanje i ocjenu ponuda dozvoljeno. Konačno, to je saglasno i sa principom transparentnosti, kao jednim od osnovnih principa postupka javne nabavke.

Dakle, u toku trajanja postupka javne nabavke ugovorni organ ne može dostaviti zapisnik sa otvaranja postupka drugim licima nego isključivo isti dostavlja samo ponuđačima u skladu sa članom 63. stav (6) Zakona.

Međutim, nakon što se odluka o izboru najpovoljnijeg ponuđača ili odluka o poništenju postupka nabavke donese, nema smetnji da ugovorni organ ustupi zapisnik sa otvaranja ponuda, drugim zainteresiranim licima u skladu sa relevantnim odredbama Zakona o slobodi pristupa informacijama u Bosni i Hercegovini.

S poštovanjem,

Dostavljeno:

- naslovu
- a/a

